

Il chavriel – in tschierv pitschen e fin

■ Il chavriel n'è betg be il represchentant il pli pitschen entaifer la famiglia dals tschiervs, mabain la pli pitschna spezia indigena d'animals ad unglia in-summa. Cun ses 18 fin 25 kg paisa el almain 5 giadas pli pauc ch'in tschierv. Era tar ils chavriels han be ils bucs ina corna. A la famiglia dals tschiervs (Cervidae) appartegnan sper il chavriel ed il tschierv er il dam, il ren e l'elan, per numnar be las spezias las pli derasadas en l'Europa. Per differenziar il chavriel indigen (Capreolus capreolus) dal chavriel sibiric al numn'ins per part er chavriel europeic. En l'Europa Centrala vivan dentant be dus cervids: il tschierv ed il chavriel. Tar nus furma il chavriel la spezia da tschiervs la pli derasada.

Tratgs caracteristics

Chavriels creschids cuntanschan ina lunghezza da 90 fin 140 cm ed in'atezza da la spatla da 55 fin 85 cm. Il pais dals chavriels prenda tiers entaifer il territori da derasaziun da las regiuns chaudas en direcziun da las regiuns fraidas. En il sidvest da la Spagna paisan ils chavriels en media 17,1 kg, en il nord dal pajais gia 23,2 kg; ed en Norvegia cuntanschan els en media in pais da 28,8 kg. Tranter ils mastgels e las femellas na dati betg differenzas significativas areguard la grondezza ed il pais.



Il pail è la stad da color brin co-tschenta. Cun la midada dal pail durant ils mais settember/october survegn quel ina color grischenta. Tant la stad sco l'enviern è la vart sut dal corp pli clera che la vart sura. L'uschenumna spievel anal sa differenziescha da l'ulteriur pail ed è per regla da color alva u melnenta. Ina caracteristica che cumpara be tar ils bucs-chavriel èn flatgs alvs vi dal mintun e da mintga vart dal lef sura, per part er sur il nas.

Ils ansiels-chavriel èn da color brin co-tschena ed han a l'entschatta flatgs alvs sin il dies e da las varts. Quests flatgs cumenzan a vegnir sblatgs suenter in mais e svaneschan dal tuttafatg cura ch'els ansiels han cuntanschi ina vegliadetgna da dus mais.

Nutrimint

Il chavriel viva en bostgets e guauds maschadads. En il bostgam po el sa zuppar e chatta in nutriment varià. Durant il di sa zuppa el en il spessom. La maglia tschertga il chavriel surtut vers saira e cun l'alva da la damaun.

Il nutriment dal chavriel sa cumpona dad erba, brumbels e feglia. Il chavriel è in nas fin che maglia mo il meglier dal meglier: erba cun blers vitamins, brumbels e chatschs savurus da chaglias e plantas. Sche blers chavriels vivan en lieu, pon els far grondos donnos vi da plantas giuvnas.

Il chavriel ha la tipica dentadira d'in erbivor: la missella sura n'ha betg dents da morder ed era betg dents chanins. Il chavriel serra la maglia tranter la lieunga ed ils dents da morder sut e sdrappa davent ella. Il dent canin sut ha la furma d'in dent da morder. Tranter el ed ils molars è ina lucca naturala en ils dents. Cun ils molars davent ed ils molars davos manizza il chavriel l'erba dira.

Cur ch'il chavriel paussa, remaglia el il nutriment ch'el ha maglià mo a la sperta. Il



L'ur dal guaud furma il spazi vital tradizional dal chavriel.

FOTO: B. JECHOW / PIXELIO

chavriel è damai in remagliader. Malgrà ch'els chavriels tschernan las plantinas las pli savurusas, cuntegna lur vivonda be ina tscherta cumpart da substanzas nutritivas. Perquai chattan ins en territoris da chavriels bleras chatlaunas.

La corna

Sumegliant als tschiervs portan er ils bucs-chavriel cornas. Quellas èn blier pli pitschnas che las cornas dal tschierv (15 fin 20 cm) e sa sviluppan per il solit fin a cornas da sis (3 pizs per corna). Sco il tschierv mida er il buc-chavriel mintg'onn la corna. El bitta giu quella mintgamai il november u december.

L'emprim creschan dus cucuns d'oss sin la cuppa da la chavazza. Quels han al cumenzament ina pel fina cun pail sco vali; questa pel sa numna pelatsch. Tras il pelatsch cula sang che furnescha las substanzas constituents per il piz da l'oss che crescha spert.

Suenter radund 4 mais (per regla l'avrigl) è il svilup da la corna terminà. L'oss mora, il pelatsch setga e vegn sfruschà davent vi da bostgam e plantas. Ussa po il chavriel duvrar sia corna sco arma. In onn pli tard bitta el danovamain giu quella.

Pir suenter avair terminà lur svilup corporal po la corna cuntanscher la lunghezza maximala. Quai è per regla il cas suenter tsching onns.

Marcar il revier e temp da chalur

En il temp da copulaziun, il fanadur ed avust, pretenda mintga buc-chavriel in revier. Quel marca el cun in'odor or d'ina glonda che sa chatta sin ses frunt. Perquai vesan ins la stad magari bucs-chavriel a sfruschar lur cornas vi da plantinas. Il buc-chavriel ha ulteriuras glondas vi da las chommas e tranter las unglas. Las odurs servan a la comunicaziun tranter ils singuls bucs.

Er chauras-chavriel en chalur derasan odurs che carmalan ils bucs. Ils chavriels èn en chalur da la fin fanadur fin l'entschatta avust. In cumportament tipic durant quest temp è ch'il taur persequescha la chavrola èn rudè.

Reproducciun

Ina particularitad dals chavriels è il paus da l'embrio: il fetus cumenza a sa sviluppar pir

cun in retard da 3 fin 4 mais (il december). En l'Europa Centrala naschan ils ansiels per regla il matg e zercladur. Il temp da purtanza dura en tut radund 290 dis ni 9,5 mais.

La chavrola fa per il solit dus ansiels. La mamma zuppa ses ansiels savens en il pastg aut u en il chagliom. Ella deditgescha ina gronda part da sia vita a la tgira da ses ansiels. Ina mes'ura fin in'ura e mesa suenter la naschientscha è l'ansiel gia bun da star en pe; suenter ina fin trais uras emprova el da far ils emprims pass. Durant trais fin quatter emnas stat l'ansiel en segirezza, entant che la mamma pasculescha e returna per laschar tezzar. Sche l'ansiel auda ina canera u senta ina savur estra, resta el airi per terra. Pir suenter trais fin quatter emnas è ses cumportament da fugia sviluppat avunda per mitschar da maschinas da segar u da scuder.

Dal segund fin il sisavel mais emprendan ils ansiels lura tras il gieu il cumportament da cumbat, da chalur e da marcar il revier. La primavaira dal proxim onn van las familias-mamma lura dapart.

Vita sociala

Durant la stad vivan ils chavriels per gronda part persuls u en pitschnas gruppas che consistan da la mamma cun ses pitschens. L'enviern sa furman dentant trieps da trais fin quatter animals. Chavriels che vivan sin il terren agrar avert pon er furmar rotschas da fin vengt individis. Questa moda da s'associar pli ferm l'enviern è in'adattaziun a la mancanza da nutriment durant ils mais fraids. Auter che tar las rotschas da tschiervs na munta questa furma da convivenza dentant betg exnum ch'els chavriels hajan contacts socials pli intensiv.

Quests trieps vegnan per regla manads d'ina chaura-chavriel ch'ha almain in ansiel. En cas da disturbis decida ella davart la direcziun da la fugia. Vers la fin da l'enviern, avant la naschientscha da la nova generaziun d'ansiels, sa schlian las rotschas puspè.

Cumportament en situaziun da privel

Il chavriel è enconuscent sco animal che s'orientescha fermamain sur l'odor. Ina gronda part da la pel mutschignusa dal nas è surtratga da betg main che 320 milliuns cellas d'odurat. Uschia èn chavriels buns d'odurar in uman en ina distanza da 300 fin 400 meters.

Ils eglis situads da la vart lubeschan al chavriel da surveisar ina gronda part da lur conturn senza stuair volver il chau. Chavriels reageschan sin moviments; objects che na sa movan betg na vesan els percunter betg fitg bain.

Cun in tun giappant sa fa il chavriel udir sch'el vegn spaventà. Questa reacziun è plitost d'interpretar sco segn d'excitaziun e d'agressiun, e main sco segn da tema. Cun giappar signalisescha il chavriel er als auters chavriels nua ch'el sa chatta.

Vegn in chavriel disturbà, stat el en pe e drizza vers anora ils lungs chavels alvs dal spievel anal. Tras quai daventa quel dapli che duas giadas uschè grond; chavriels che sa chattan en la vischinanza vegnan attents al privel e cumenzan medemamain a segirar.

Prenda il chavriel la fugia, alura fa el quai tschertgond cun paucs sigls protecziun en il spessom. En quest regard sa differenziescha el dal tschierv che sa salva cun currer perseverantamain sur lungas distanzas.

Decurs dal di

Il chavriel vala sco animal activ surtut da di, ma che dovra entaifer 24 uras otg fin indesch periodas da pavlada. Correspudentamain vegn il ritmus dal di dominà da la tschertga da pavel, dal pavlar e remagliar. La primavaira e la stad passentan ils chavriels radund sis uras a di cun sa nutrir; ulteriuras sis uras ruassan els, quatter uras dorman



L'enviern signifitga per ils chavriels in cumbat permanent cunter la fom e la fradaglia.

FOTO PD

els e duas uras basegnan els per girar enturn. L'atun e l'enviern dovran els in'ura pli ditg per pavlar ed in'ura pli ditg per remagliar (damai ch'il nutriment cuntegna pli paucas valurs nutritivas che la stad). Ultra da quai ston els girar enturn trais uras per chattar avunda pavel; uschia restan durant las stagions fraidas be pli paucas uras per ruassar e durmir.

Spazi vital

Oriundamain viveva il chavriel a l'ur dal guaud ed en cleragls. En il decurs dal temp è el però s'adattà a habitats fitg differentes; ozendi al chatt'ins er en steppa agrara avarta che na porscha quasi nagina protecziun. Ils territoris da guaud èn oz savens pli pitschens che pli baud e circumdads da territoris d'agricultura; quai ha stgaffi spazi da viver supplementar ch'il chavriel ha premdi vastamain en possess. La speschezza da chavriels è en talas regiuns radund 10 fin 20 giadas pli auta che en territoris da guaud ch'èn segnads d'ina structura da vegliadetgna naturala.

Il chavriel è pauc adattà a la vita en las muntognas. Tuttina munta el fin al cunfin dal guaud e mintgatant perfin plinensi. En la regiun alpina viva el surtut en il guaud mez avert e sin pastgiras d'alp creschidas en. Sumegliant als tschiervs fan er ils chavriels distanzas pli lungas dal quartier da stad fin al quartier d'enviern (fin a 25 km).

Cumbat per survivor l'enviern

Passentar l'enviern en las regiuns alpinas u subalpinas signifitga in cumbat permanent

cunter la fom e la gronda fradaglia. Cun lur pitschens chalzers sfundran ils chavriels profundamain en la naiv ed han uschia fadia da sa muventar.

L'enviern chatta il chavriel mo pouca vivonda ch'è ultra da quai pli greva da digerir. Ses magun s'adatta però a las circumstanzas, regressond per bunamain 20%. Uschia po el tuttina vegnir emplen, quai ch'è fitg impurtant per la digestiun.

Disturbis tras l'uman pon far grond donn als chavriels. Els fugian en panica tras la navaglia e perdan qua tras blier energia. Per ina minuta en fugia dovra la selvaschina tant energia sco per in'ura al pass. Donnus da plantas giuvnas, spussada e mort pon esser las consequenzas.

Inimis ed aspectativa da vita

Chavriels che vivan en libertad cuntanschan be darar ina vegliadetgna che surpassa diesch u duresch onns. En questa vegliadetgna èn ils dents (surtut ils molars) per ordinari isads talmain che l'animal n'è betg pli bun da mastegiar il nutriment.

Ma la vegliadetgna media d'ina populaziun da chavriels vegn anc influenzada da blers auters facturs, uschia che quella è savens fitg bassa. Be 15 procent da tut ils chavriels vegnan pli vegls che trais u quatter onns. Damai ch'els èn bundant pli pitschens che auters animals ad unglia europeics (tschierv, elan, bison europeic), han ils chavriels blers inimis naturalis. Vitiers vegnan tut tenor regiun influenzas climaticas, la speschezza da l'effectiv sco er malsognas e parasits. Tuttina furma il chavriel ina spezia ch'è derasada

vastamain en l'Europa Centrala. En tscherts lieux è lur effectiv talmain auts ch'els periclitescan la regiuvnaziun naturala dal guaud. La creschientscha da las populaziuns da chavriels ha inizià en il 19avel tschientaner, cura che l'effectiv da tschiervs è sa sbassà pervi da la chatscha. A medem temp è tschessentada la disa da laschar pascular ils animals manidels (surtut chauras) en il guaud. Omadus facturs han reduci il squitsch da concorrenza a favur dals chavriels.

Betg tutgar ils chavriels!

Grazia a lur pail taclà èn ils ansiels-chavriel camuflads perfetgamain. In'ulteriura protecziun furma la mancanza d'atgna odor, la quala la mamma letga davent curt suenter la naschientscha. Quai è er il motiv, daco ch'ins na duess mai tutgar animals giuvens: ils ansiels pudessan surpigliar l'odor da l'uman e vegnir refusads uschia da la mamma.

La preschentaziun:
Dossier «Chavriel».

Dapli infurmaziuns:
chatta.ch/?hiid=1293
www.chattà.ch



Il camuflagi tipic da l'ansiel.

FOTO PD